

Aruba ta recordá Rufo Wever

Awe, pueblo di Aruba ta recordá, cu 16 aña pasá, entre 5'or pa 6'or di atardi e golpi duro a cai den curazón di henter poblacion di Aruba, ora cu e noticia tristo a plama den pueblo, cu Sr. Rufo Wever a fayece na Dr. Horacio Oduber Hospital. Antiyas a keda paralizá y henter Aruba a sacudí, n'e momento cu e noticia tirsto áki a ser anunciá.

No tabatin palabranan suficiente, pa consolá tur esnan cu a sinti e dolor inmenso aki. Pasobra n'e momento ey, henter Aruba a realizá ki gran genio nan a perde. No tabatin consuelo pa su amigo y conociernan, cu pa tanto aña tabat'asina cerca di su curazón. No tabatin nada na mundo, pa calma e gritonan di tristeza y lagrimanan di su famía, cu semper tabata aprecié y apoyé den su trabaonan talentoso y bunita di por a crea y trece pa su pueblo tur su obranan músical cu awe nos ta disfrutando asina tanto di nan.

Rufo a nace na Aruba, dia 8 di December di aña 1917. Na un edad hoben, 12 aña, Rufo a cuminzá toca piano y a duna evidencia di su talento músical excepcional. Na edad di 15 aña, den aña 1932, Rufo cu algun amigo, a forma nan propio orkesta cu tabata hiba e nomber di Melody Band, consistiendo di músiconan manera: Sr Boysy Lampe dirigente y violinísta, Tway Croes, na cornetin, Tom Lampe y Wewe Croes violinísta, Shemmy Coronel cu banzjo, Clemente Laclé na drum y Rufo mes na piano.

E orkesta aki sin duda tabata un gran sensacion den e tempo ey cu tabata alegrá e curazónnan di nos pueblo. Den epoca di Carlos Gardel, den añanan 1935 pa 1937 Rufo hunto cu su amigonan guitarista Sr. Carlito Booi, Harold Hopmans, Jan Eusebio Croes, Shemmy Coronel y Clemente Laclé como cantante di Tango, a forma un grupo di ~~Gauchos~~ cu a ser yamá "Los Trovadores Tropicales" kendenan a actua varios vez den teatronan na Corsow y radio emisora CUROM deleitando tur amante di Tango na Antiyas.

Despues Rufo a cuminzá componé música. Y su promé composicion tabata e bunita wals Arubanita. E wals aki tabata e único melodia cu Su Mahestad Reina Juliana a baila na Antiyas Nerlandes. Esaki por cierto Rufo a considerá di un gran honor pe. Tambe Rufo tabata prepará música riba cilindro di cah'i orgel, cual arte ta rekerí hopi pasenshi, precision y saber.

Mas di tres-shen precioso melodia a ser poní riba cilindro di cah'i orgel pa Rufo. Rufo kende mientras tanto a bira masha popular como músico y pianista, desafortunadamente a perde su braza robéz den un accidente di tráfico riba dia 15 di December di aña 1941. A consecuencia di e accidente, Rufo prácticamente a retirá for di bida público y lógicamente a pensa cu hamas nunca e lo por bolbe toca piano. Sinembargo despues di poco tempo, inspirá pa su gran amor pa música y e deseo pa bolbe toca atrobe, Rufo mes a diseñá y laga traha un braza artificial cual parcialmente a yuda vence e dificultad y a sigui toca piano sopresivamente.

Rufo a actua varios vez den su programana dilanti pantaya di Tele-Aruba. Tambe den television na Venezuela, Costa Rica, Puerto Rico y Corsow. Na aña 1975, pa su numeroso mérito y trabaonan na interes y bienestar di su pueblo, Rufo a ricibí for di su Mahestad Reina Juliana un condecoracion. Aruba por ta orguyoso di por a producí un genio manera Rufo. Un di e dianan mas feliz den Rufo su bida tabata dia 16 di Maart 1976, ora cu el a expresá su satisfaccion y alegria cu su composicion y di su amigo y colega Padu, Aruba Dushi Tera, a ser promulga oficialmente Himno Nacional di Aruba.

E genio compositor, e pianista sobresaliente Rufo Wever a laga nos. Pero e no a bai laga nos sin mas. Pasobra durante su bida meritorio di artista el a crea un caudal (fortuna) di composicionnan cu lo sigui perdurá den futuro como riqueza cultural y valioso pa su pueblo.

Rufo no tey mas, pero su música lo conta e generacionnan cu lo sigui e vibracionnan músical cu ta reina den curazón di su Aruba cu tanto el a stima. Prueba di esaki ta, cu su promé composicion a hiba como título Arubanita. Cu gran amor y aprecio pa su isla natal, den varios di su composicionnan, tabata aparecé un toke di patriotismo cu a bin culminá felizmente den e notanan vibrante di Aruba Dushi Tera. Historia lo sigui recordé como co-autor di tal himno. Himno cu a contagia y pone vibra curazónnan di tur Arubiano y tambe di tur e cuarenta y pico nacionalidad cu ta forma parti di e comunidad Arubiano.

Rufo ta descansando, pero su música lo sigui biba no solamente den cada rincon di su isla stimá, pero ta cruzando fronteranan lehanu pa alegre curazónnan den varios continente, proclamando cultura músical di su Dushi Aruba.

Cu su recuerdo sigui inspirá curazónnan di tur esnan cu ta forma parti di su Aruba Dushi Tera.

Rufo...sosega na paz.

E culto pueblo di Aruba ta keda coridalmemente invitá pa sintonizá Radio Kelkboom awe nochi 9'or pa un programa recordatorio na honor di difunto Rufo Wever. □